



Sabtu, 05 Pebruari 2022

Ogen : Esekiel 27:1-36



"Masap Seh Rasa Lalap"



Melala kal inganta erlajar. Arah batu erlajar kita segelah paguh, arah taneh erlajar kita bertumbuh (peturah semangat), arah lau erlajar kita kiniteruken ukur, janah wari enda erlajar kita arah pengalamen geluh bangsa bangsa Tirus. Uga kin kegeluhen bangsa Tirus? Ogenta nuriken maka Tirus enda bangsa si tading i tepi lawit. Pencarinna erbinaga. Kinibayakenna ituriken alu rumahna si mejile ipanteki desken sada kapal si ibangun alu barang-barang si seh kal jilena e me kayu aras deleng Hermon, kayu cemara Libanon ras Siprus, kayu jati i Basan; layar ibuat i bas linen sulamen i Mesir nari janah tenda-tenda arah kain unggu i Kiprus nari, rikut pe sierdahinna e me tukang dayung i Sidon nari, tukang kayu i Balblas nari. Kerina enda ncidahken kinibayaken ras kinihagan Tirus. La terjeng si e bas pendahin erbinaga pe seh lancarna dingnen mererken untung si seh belinna. Bangsa-bangsa sideban nukarken (barter) barang-barangna si mehergana ku Tirus e me pirak, besi, timah, tembaga, batu permata, uis meherga, linen halus, gandum, tengguli, minak saitun, rempah-rempah, anak biri-biri, emas. Melala kuta-kuta erbinaga ras Tirus. Enda me masa-masa kejayaan Tirus. Bayak, mehaga, jaya ia, janah turah me kiniganjangen rukur, alu maba kerina barang-barang kinibayakenna e arah sada kapal. Erlayar maba barang-barang si mberat e, tapi kai si jadi i tengah lawit reh angin timur erbahanca gedap kerina se isi kapal e. Keri kebayaken, keru kinijilen, keru kerina si sedekah enda ihagaken. Ibegi bangsa-bangsa sideban kerna berita Tirus sengget dingnen gentar ras mbiar ia kerina. Tirus enggo kernep masap seh rasa lalap. Kai banci sipelajari arah Tirus enda? Kiniganjangen rukur maka mara ku kegeluhen. Kiniteruken ukur erbahanca kita selamat, tapi kiniganjangen rukur erbahanca masap seh rasa lalap. Kata Dibata malem ate tuhu-tuhu kalak simeteruk ukurna, sabap sehken Dibata padanNa man bana (Mat. 5:5)